

## AVON sumbang RM315,000 bantu HUSM rawat kanser payu dara

KUALA LUMPUR 11 April - Pengeluar produk kecantikan global, Avon menyumbang dana sebanyak AS\$100,000 (RM315,000) kepada Hospital Universiti Sains Malaysia (HUSM) bagi membantu usaha mengawal kanser payu dara di negara ini.

Majlis penyampaian sumbangan tersebut disaksikan oleh Raja Permaisuri Agong, Tuanku Nur Zahirah yang berangkat pada gala Ibuku, Inspirasi-ku anjuran Avon Cosmetic (Malaysia) di Hotel Hilton di sini hari ini.

Sumbangan itu disampaikan oleh Ketua Pegawai Eksekutif Avon Products Global, Andrea Jung kepada Pengarah HUSM, Datuk Dr. Mafauzy Mohamed.

Jung dalam ucapannya berkata, sumbangan berkenaan adalah sebagai sokongan Avon kepada penjagaan kesihatan golongan wanita di Malaysia.

"Sumbangan ini akan digunakan untuk menuhkan sebuah Pusat Sumber Kanser Payu Dara dan membeli mesin mamogram, sistem ujian biopsi dan peralatan lain.

"Sebagai sebuah syarikat khusus untuk golongan wanita yang terbesar di dunia, Avon komited dalam membantu wanita Malaysia menjaga kesihatan selain mengukuhkan diri dari segi ekonomi," katanya.

Hadir sama pada majlis berkenaan ialah Timbalan Menteri Pembangunan Wanita, Keluarga dan Masyarakat, Noriah Kasnon dan Timbalan Menteri Sumber Manusia, Datuk Noraini Ahmad.

Pada majlis yang sama, Avon turut menyampaikan anugerah kepada empat orang ibu iaitu anugerah Ibu Kerjaya untuk pakar perbidanan dan sakit puan, Datuk Dr. Nor Ashikin Ahmad Mokhtar; Datuk Maznah Hamid (Ibu Usahawan), Datuk F.R. Bhupalan (Ibu Komuniti) dan Tan Tong Leng (Ibu Inspirasi Wakil Avon).

Sementara itu, Anugerah Ibu Avon 2008 diberikan kepada Datin Nik Latifah Nik Daud iaitu ibu kepada Presiden Avon Malaysia, Thailand, Vietnam dan Indonesia, Mansoor Wan Abdullah.

Majlis berkenaan turut menyaksikan pelancaran haruman terbaru Avon iaitu 'Today. Tomorrow. Always in Bloom'.

**TUANKU Nur Zahirah** (empat dari kiri) dan **Noriah Kasnon** (lima dari kiri) bersama penerima anugerah dari kiri **Maznah Hamid**, **Dr. Nor Ashikin**, **Mansoor Wan Abdullah**, **Andrea Jung**, **F.R. Bhupalan** dan **Tan Tong Leng** pada majlis gala 'Ibuku Inspirasi-ku' 2008, semalam.

